

通志卷一百二十八

釋名銘安

宋右迪功郎鄭樵漁仲撰

列傳第四十一

晉

王舒子允王廙弟彬彬子彪虞潭孫嘯父顧

眾張闔陸晔晔弟玩何充褚璉蔡謨

諸葛恢殷浩顧悅之孔愉子汪安國弟祇

弟羣羣子沉丁潭張陶回謝猗謝安安子琰琰

朗朗弟子邈安弟万万弟石石兄子朗

通志

卷一百二十八

王舒字處明丞相導之從弟也父會侍御史舒少爲從
兄敦所知以天下多故不營當時名恒處私門潛心學
植年四十餘州禮命太傅辟皆不就及敦爲青州舒往
依焉時敦被徵爲秘書監以寇難路險輕騎歸洛陽委
棄公主時輜重金寶甚多親賓無不競取惟舒一無所
眄益爲敦所賞及元帝鎮建康因與諸父兄弟俱渡江
委質焉參鎮東軍事出補溧陽令明帝之爲東中郎將
妙選上佐以舒爲司馬轉後將軍宣城公褚裒諮議參
軍遷軍司固辭不受裒鎮廣陵復以舒爲車騎司馬頻

領望府咸稱明練哀薨遂代哀鎮除北中郎將監青徐
二州軍事頃之徵國子博士加散騎常侍未拜轉少府
太寧初徙廷尉敦表舒爲鷹揚將軍荊州刺史領護南
蠻校尉監荊州沔南諸軍事及敦敗王含父子俱奔舒
舒遣軍逆之並沉於江進都督荊州平西將軍假節尋
以陶侃代舒轉舒爲安南將軍廣州刺史舒疾病不樂
越嶺朝議亦以其有功不應遠出乃徙爲湘州刺史將
軍都督持節如故徵代鄧攸爲尙書僕射時將徵蘇峻
司徒王導欲出舒爲外援乃授撫軍將軍會稽內史秩

中二千石舒上疏辭以父名會朝議以字同音異於禮
無嫌舒復陳音雖異而字同求換他郡於是改會字爲
鄒舒不得已而行在郡二年而蘇峻作逆乃假舒節都
督行揚州刺史事時吳國內史庾冰棄郡奔舒舒移告
屬郡以吳王師虞駿爲軍司御史中丞謝藻行龍驤將
軍監前鋒征討軍事率眾一萬與庾冰俱渡浙江前義
興太守顧眾護軍參軍顧颺等皆起義軍以應舒舒假
眾揚威將軍督護吳中軍事颺監晉陵軍事於御亭築
壘峻聞舒等兵起乃赦庾亮諸弟以悅東軍舒率眾次

郡之西江爲冰藻後繼冰颺等遣前鋒進據無錫遇賊將張健等數千人交戰大敗奔還御亭復自相驚擾冰颺等並敗於錢唐藻守嘉興賊遂入吳燒府舍掠諸縣所在塗地舒以輕進奔敗斬二軍主者免冰颺督護以白衣行事更以顧眾督護吳晉陵軍屯兵章埭吳興太守虞潭率所領討健屯烏苞亭並不敢進時暴雨大水賊管商乘船旁出襲潭及眾潭等奔敗潭還保吳興眾退守錢唐舒更遣將軍陳孺率精銳千人增戍海浦所在築壘或勸舒宜還都使謝藻守西陵挾海立柵舒不

聽留藻錢唐使眾颺守紫壁於是賊轉攻吳興潭諸軍復退賊復掠東遷餘杭武康諸縣舒遣子允之行揚烈將軍與將軍徐遜陳孺及揚烈司馬朱燾以精銳三千輕邀賊於武康出其不意遂破之斬首數百級賊悉委舟步走允之收其器械進兵助潭時賊韓晃旣破宣城轉入故鄣長城允之遣朱燾何準等擊之戰於于湖潭以彊弩射之晃等退走斬首千餘級納降二千人潭由是得保郡是時臨海新安諸山縣並反應賊舒分兵悉討平之會陶侃等至京都舒潭等並以屢戰失利移書

盟府自貶去節侃遣使敦喻不聽及侃立行臺上舒監
浙江東五郡軍事允之督護吳郡義興晉陵三郡征討
軍事旣而晃等南走允之追躡於長塘湖復大破之賊
平以功封彭澤縣侯尋卒官贈車騎大將軍儀同三司
諡曰穆長子晏之蘇峻時爲護軍參軍被害晏之子崑
之嗣卒子陋之嗣宋受禪國除晏之弟允之最知名允
之字深猷總角從伯敦謂爲似已恒以自隨出則同輿
入則共寢敦嘗夜飲允之辭醉先臥敦與錢鳳謀爲逆
允之已醒悉聞其言慮敦或疑已便於臥處大吐衣面

並汚鳳旣出敦果照視見允之臥吐中以爲大醉不復疑之時父舒始拜廷尉允之求還定省敦許之至都以敦鳳之謀議事曰舒舒卽與導俱啟明帝舒爲荊州允之隨在西府及敦平帝欲令允之仕舒請曰臣子尙少不樂早官帝許隨舒之會稽及蘇峻反允之討賊有功封番禺縣侯邑千六百戶除建武將軍錢唐令領司鹽都尉舒卒去職旣葬除義興太守以憂哀不拜從伯導與其書曰太保安豐侯以孝聞天下不得辭司隸和長興海內名士不免作中書令吾羣從死亡略盡子弟零

落遇汝如親如其不爾吾復何言允之固不肯就咸和
末除宣城內史監揚州江西四郡事建武將軍鎮于湖
咸康中進號西中郎將假節尋遷南中郎將江州刺史
莅政甚有威惠時王恬服闋除豫章郡允之聞之驚愕
以爲恬丞相子應被優遇不可出爲遠郡乃求自解州
欲與庾冰言之冰聞甚愧卽以恬爲吳郡而以允之爲
衛將軍會稽內史未到卒年四十諡曰忠子晞之嗣卒
子肇之嗣

王廙字世將丞相導從弟而元帝姨弟也父正尙書郎

廩少能屬文多所通涉工書畫善音樂射御博弈雜伎
辟太傅掾轉參軍豫迎大駕封武陵縣侯拜尙書郎出
爲濮陽太守元帝作鎮江左廩棄郡過江帝見之大悅
以爲司馬頻守廬江鄱陽二郡豫討周馥杜弢以功累
增封邑除冠軍將軍鎮石頭領丞相軍諮祭酒王敦啟
爲寧遠將軍荊州刺史及帝卽位廩奏中興賦上疏稱
述功德文多不載初王敦左遷陶侃使廩代爲荊州將
吏馬俊鄭攀等上書請留侃敦不許廩爲俊等所襲奔
於江安賊杜曾與俊攀北迎第五猗以距廩廩督諸軍

討曾又爲曾所敗敦命湘州刺史甘卓豫章太守周廣等助廩擊曾眾潰廩得到州廩性僞率嘗從南下旦自尋陽迅風飛帆暮至都倚舫樓長嘯神氣甚逸王導謂庾亮曰世將爲傷時識事亮曰正足舒其逸氣耳廩在州大誅戮侃時將佐及徵士皇甫方回於是大失荆土之望人情乖阻帝乃徵廩爲輔國將軍加散騎常侍以母喪去職服闋拜征虜將軍進左衛將軍及王敦構禍帝遣廩喻敦旣不能諫其悖逆乃爲敦所留受任助亂敦得志以廩爲平南將軍領護南蠻校尉荊州刺史尋

病卒帝猶以親故深痛愍之喪還京都皇太子親臨拜
柩如家人之禮贈侍中驃騎將軍諡曰康明帝與大將
軍溫嶠書曰痛謝鯤未絕於口世將復至於此並盛年
儁才不遂其志痛切於心庾明古多通鯤遠有識致其
言雖未足令人改聽然味之不倦近未易有也坐相視
盡如何子頤之嗣仕至東海內史頤之弟胡之字修齡
弱冠有聲譽厯郡守侍中丹陽尹素有風眩疾發動甚
數而神明不損石虎死朝廷欲綏輯河洛以胡之爲西
中郎將司州刺史假節以疾固辭未行而卒子茂之亦

有美譽官至晉陵太守子敬弘義熙末爲尙書廩弟彬
字世儒少稱雅正弱冠不就州郡之命光祿大夫傅祗
辟爲掾後與兄廩俱渡江爲揚州刺史劉機建武長史
元帝引爲鎮東賊曹參軍轉典兵參軍豫討華軼功封
都亭侯愍帝召爲尙書郎以道險不就遷建安太守徙
義興丙史未之職轉軍諮祭酒中興建稍遷侍中從兄
敦舉兵入石頭帝使彬勞之會周顗遇害彬素與顗善
先往哭顗甚慟旣而見敦敦怪其有慘容而問其所以
彬曰向哭伯仁情不能已敦怒曰伯仁自致刑戮且凡

人遇汝復何爲者哉彬曰伯仁長者君之親友在朝雖無謬誤亦非阿黨而赦後加之極刑所以傷惋也因勃然數敦曰兄抗旌犯順殺戮忠良謀圖不軌禍及門戶音辭慷慨聲淚俱下敦大怒厲聲曰爾狂悖乃可至此爲吾不能殺汝邪時王導在坐爲之懼勸彬起謝彬曰有腳疾已來見天子尙欲不拜何跪之有此復何所謝敦曰腳痛孰若頸痛彬意氣自若殊無懼容後敦議舉兵向京師彬諫甚苦敦變色目左右將收彬彬正色曰君昔歲殺兄今又殺弟邪先是彬從兄豫章太守稜爲

敦所害敦以彬親故容忍之俄而以彬爲豫章太守彬爲人樸素方直乏風味之好雖居顯貴常布衣蔬食遷前將軍江州刺史及敦死王含欲投王舒王應勸含投彬含曰大將軍平素與江州云何汝欲歸之應曰此乃所以宜往也江州當人彊盛時能立異同此非常人所及覩衰厄必興愍惻荊州守文豈能意外行事含不從遂共投舒舒果沉含父子於江彬聞應來密具船以待之既不至深以爲恨敦平有司奏彬及兄子安成太守籍之並是敦近親皆除名詔曰司徒導以大義滅親其

後昆雖或有違猶將百世宥之况彬等公之近親乃原之徵拜光祿勳轉度支尙書蘇峻平後改築新宮彬爲大匠以營創勲勞賜爵關內侯遷尙書右僕射卒官年五十九贈特進衛將軍加散騎常侍諡曰肅長子彭之嗣位至黃門郎次彪之最知名彪之字叔虎年二十鬚鬢皓白時人謂之王白鬚初除佐著作郎東海王文學從伯導謂曰選官欲以汝爲尙書郎汝幸可作諸王佐邪彪之曰位之多少旣不足計自當任之於時至於超遷是所不願遂爲郎鎮軍將軍武陵王晞以爲司馬累

遷尙書左丞司徒左長史御史中丞侍中廷尉時永嘉
太守謝毅赦後殺郡人周矯矯從兄球詣州訴冤揚州
刺史殷浩遣從事收毅付廷尉彪之以球爲獄主身無
王爵非廷尉所料不肯受與州相反覆穆帝發詔令受
之彪之又上疏執據時人比之張釋之時當南郊簡文
帝爲撫軍執政訪彪之應有赦不荅曰中興以來郊祀
往往有赦愚意常謂非宜何者黎庶不達其意將謂郊
祀必赦至此時凶愚之輩復生心於僥倖矣遂從之轉
吏部尙書簡文有命用秣陵令曲安遠補句容令殿中